



19. Oktober 2022

UKA2022_86

Immiaaqqat imeruusaatillu kulsyrimik akullit Kalaallit Nunaanni puujaasat dâs-illu angissutsit assigiinngitsunik tuniniarneqarsinnaanngorlugit puui pillugit nalunaarusiaq1 allanngortinnerasigut Naalakkersuisut qulakkeerinninnissaat pillugu Inatsisartunut aalajangiiffigisassaattut siunnersuut. Utertitsisarnermut aqqissuussami puujaasat dâs-illu ilaasinnaassapput. Siunnersuummik akuersereernerup kingorna sukkanerpaamik allannguisoqassaaq – kingusinnerpaamilli 1. januar 2024.

(Inatsisartunut Ilaasortaq Jens-Frederik Nielsen, Demokraatit)

Inatsisartunut ilaasortap, Demokraatineersup Jens-Frederik Nielsenip siunnersuutaanut Siumumiit imaattumik oqaaseqassaagut.

Kingullermik 2019-mi siunnersuut oqallisigineqarmat partiit amerlanerpaat siunnersuummut ilaliillutillu isumaqataasimapput, siunnersuullu maanna qaqileqqinneqartoq Siumumiit tamakkiisumik ilalerlugulu isumaqatigigipput oqaatigissavara.

Puiaasanik utertitsisarnerup aqqissuuteqqinneqarnissaa anguniarlugu poortuutitut nalunaarutip allanngortinneqartariaqarnera Siumumiit tapersorsorparput.

ESANI a/s-mit utertitsisarnermut periusissiarineqartoq siulleq naammassilluinnalersimasoq naalakkersuisut akissuteqaamminni oqaatigaat, tamatumalu kingunerissavaa periarfissaq atuutsinneqarsinnaalernissaminut qanilliallattoq. Puiaasat utertittagaanngitsut pinngortitamut annertuumik mingutsitsisinnaanerat qanga takoreersimavarput.

Taamak pisoqaaqqinnginnissaa anguniarlugu Siumumiit puiaasanik utertitsisarnermut periutsinik nutaanik eqqussisoqartillugu utertitsisarnissamik periusissioqartarnissaa kissaatigaarput.

Siumumiit taamak oqaaseqarluta siunnersuut ataatsimiititaliamut susassaartumut suliarilluarneqarnissaa siunertaralugu innersuupparput.

Lars Poulsen, Siumut